

ORDENANZA Nº 12

**REGULADORA DO PREZO PÚBLICO POR SERVIZOS NO CENTRO**

**RESIDENCIAL DOCENTE CALVO SOTELO**

(BOP número 73, do 21 de abril de 2010)  
(BOP número 236, do 14 de decembro de 2011)  
(BOP número 237, do 13 de decembro de 2012)  
(BOP número 238, do 16 de decembro de 2013)

**Artigo 1. - Concepto**

De acordo co disposto no art. 148 en relación co art. 41, ambos os dous do Texto refundido da lei reguladora das facendas locais aprobado polo R.D.L. 2/2004 do 5 de marzo, esta Deputación establece o prezo público por servizos no Centro Residencial Docente Calvo Sotelo, que se rexerá polo que dispón esta ordenanza.

**Artigo 2. - Obrigados ao pagamento**

Estarán obrigadas ao pagamento as persoas físicas ou xurídicas que soliciten a utilización do Servizo ou as que resulten beneficiadas polo devandito Servizo.

**Artigo 3. - Non obrigados ao pagamento.**

Os membros de familias cuxos ingresos brutos anuais de cada membro da unidade familiar non sexa superior á metade do IPREM (Indicador público de renda de efectos múltiples) no mesmo período.

O concepto de unidade familiar será o definido na normativa do imposto da renda das persoas físicas.

Os ingresos brutos entenderanse como a base imponible do IRPF ou os que acrediten por outro medio cando o beneficiario ou usuario non teña obriga de presentar o IRPF, correspondente ao período impositivo inmediatamente anterior ao da solicitude de ingreso.

**Artigo 4. - Contía**

1. - As tarifas do prezo público serán as seguintes:

Centro Residencial Docente Calvo Sotelo:

- a) Internos, cada un ao mes, 217,70 €
- b) Medio-pensionistas, cada un ao mes, 64,75 €
- c) Tique comedor día, 4,90 €

2. - Establécese un réxime de exención do 100 por cento aos membros das familias numerosas clasificadas na categoría especial e unha bonificación do 50 por cento

para os de categoría xeral. Estes beneficios deberaos solicitar expresamente o obrigado ao pagamento perante a Deputación provincial no momento de presentación da solicitude da prestación do servizo de internado ou medio-pensionista no Centro Residencial Docente Calvo Sotelo. Para estes efectos deberá acompañarse documentación xustificativa da súa condición de membro de familia numerosa e da categoría na que se clasifique, na correspondente data de obriga de pagamento.

Procederá a exención ou bonificación cando se teña a condición de beneficiario de familia numerosa ao comezo do curso académico ou escolar en que haxa de aplicarse. Se en tal data o título está en tramitación, poderanse obter os referidos beneficios acreditando a presentación da solicitude de recoñecemento ou renovación, así como unha declaración xurada da categoría en que a familia numerosa queda clasificada. Se antes do 31 de decembro do ano corrente non se presenta a xustificación do título, anularanse automaticamente os beneficios concedidos e procederá o abono do seu importe. Cando o título concedido fose de inferior categoría á declarada, deberase aboar a diferenza que corresponda.

A perda da condición de membro de familia numerosa e o cambio de categoría durante o curso académico non alterará o desfrute e contía do beneficio ata a súa terminación.

Cando no alumno beneficiario de familia numerosa concorresen outra ou outras causas de exención ou bonificación, acumularánselle todas as vantaxes que non supoñan duplicación do mesmo beneficio.

3. - A petición do interesado, tramitarase expediente de redución da tarifa do 75% ou 50% do importe total cando os ingresos da unidade familiar non superen nun 50% ou nun 75%, respectivamente, os importes sinalados no artigo 3.

Unha vez iniciada a prestación dos servizos de internado e media-pensión, só excepcionalmente, e por causa sobrevida convenientemente xustificada, poderá tramitarse o expediente de solicitude de redución de factura contemplada no apartado anterior.

4. - Estas tarifas enténdense sen prexuízo da repercusión legal que, no seu caso, deba realizarse polos impostos indirectos que graven a prestación do servizo ou acto suxeito.

#### **Artigo 5. - Obrigas de pagamento**

Para as tarifas de internado e medio-pensionista a obriga do pagamento do prezo público nace cando se inicie a prestación do servizo ou da actividade, con periodicidade mensual.

Para a tarifa de tique comedor día a obriga do pagamento do prezo público nace cando se inicie a prestación do servizo, entendendo para estes efectos que a devandita iniciación se produce coa solicitude destes, con periodicidade diaria.

## **Artigo 6. - Normas de xestión**

1. - O servizo de internado poderao utilizar as persoas que sexan alumnas do I.E.S. Calvo Sotelo ou que cursaran o primeiro curso de Programas de Cualificación Profesional Inicial no I.E.S. Calvo Sotelo e que por imperativo legal deban realizar o segundo curso noutro centro.

O servizo de comedor (medio-pensionista/tique comedor día) poderao utilizar o alumnado externo do I.E.S Calvo Sotelo.

2. - As prazas de internado e medio-pensionista adxudicaranse por resolución de Presidencia a través da Sección de Cultura e Deportes.

3. - Na prestación do servizo de internado e media-pensión:

A) A obriga de pagar nace dende que se inicia a prestación do servizo, é dicir, o día primeiro do mes corrente, e o primeiro de todos os meses seguintes ou do seguinte mes a aquel en que teña lugar a reincorporación ou alta como consecuencia de baixa xustificada.

As baixas na prestación do servizo comunicaranse por escrito no Centro Residencial Docente Calvo Sotelo. Para que as devanditas baixas eximan do pagamento deberanse presentar dentro dos dez primeiros días naturais do correspondente mes, as que se comuniquen a partir do día 11 do mes, producirán efecto no mes seguinte.

As solicitudes de cambio de réxime de estanzas, presentaranse no Centro Residencial Docente Calvo Sotelo, indicando expresamente a data de efectos da alteración. Para os efectos liquidatorios, sen prexuízo da correspondente comprobación administrativa, a solicitude presentada non terá efectos retroactivos. Nos cambios de réxime de estanzas producidos unha vez iniciado o mes calcularase a cota mensual de xeito proporcional, é dicir, sumando as dúas cotas resultantes calculadas proporcionalmente ao tempo transcorrido en cada tipo de réxime de estanza.

B) A Sección de Recursos Propios levará a cabo a liquidación de tarifas, que a realizará mensualmente, sendo estas irredutibles. Para iso, o Centro Residencial Docente Calvo Sotelo, elaborará ao inicio de cada curso académico, a correspondente relación de adxudicación de prazas de internado e medio-pensionista.

Para os efectos sinalados e de acordo co apartado 3 anterior, a Dirección do Centro Residencial Docente Calvo Sotelo comunicará á Sección de Recursos Propios, calquera alta, baixa ou modificación que se produza, autorizada pola Presidencia da Deputación provincial, indicándose a data para efectos da alteración.

4. - Na prestación do servizo de tique comedor día:

Os usuarios do servizo do tique comedor día deberano solicitar diariamente no CRD Calvo Sotelo.

As disposicións necesarias para o desenvolvemento e execución deste servizo serán ditadas pola Presidencia da Deputación mediante resolución.

5. - Os non obrigados ao pagamento, exentos por familia numerosa e os que se acollen a redución da tarifa, deberán solicitalo expresamente perante a Deputación no momento da presentación da solicitude de prestación do servizo de internado ou medio-pensionista do Centro Residencial Docente Calvo Sotelo, e deberá achegarse a documentación acreditativa das circunstancias que lle permitan aplicar a correspondente exoneración de pagamento.

Os usuarios do servizo de tique comedor día, non obrigados ao pagamento, exentos por familia numerosa e os que se acollen a redución da tarifa, deberán solicitalo expresamente perante a Deputación durante o período comprendido dende que se abre o prazo da matrícula ata 15 días antes do inicio do curso escolar correspondente.

### **Artigo 7. - Remisión á Ordenanza Fiscal Xeral**

En todo o non especialmente establecido nesta ordenanza, estarase ao disposto na Ordenanza Fiscal Xeral.

**Disposición Final.** - A presente Ordenanza fiscal entrará en vigor o día seguinte da súa publicación no BOP e será de aplicación para o curso escolar 2010/2011, permanecendo vixente ata que se acorde a súa modificación ou derogación expresa. E derroga a ordenanza Nº 12, reguladora do prezo público por servizos no Centro Residencial Docente Calvo Sotelo aprobada polo Pleno do 26 de outubro de 2006.

**Dilixencia.** - A presente Ordenanza fiscal foi aprobada polo Pleno da Deputación Provincial da Coruña o día 26 de febreiro de 2010.

- 
- Por acordo plenario celebrado o día 28 de outubro de 2011 (BOP núm. 236 con data do 14 de decembro de 2011) foi modificado o artigo 4.1. Esta modificación entra en vigor para o curso escolar 2012/2013.
  - Por acordo plenario celebrado o día 26 de outubro de 2012 (BOP núm. 237 con data do 13 de decembro de 2012) foi modificado o artigo 4.1. Esta modificación entra en vigor para o curso escolar 2013/2014.
  - Por acordo plenario celebrado o día 25 de outubro de 2013 (BOP núm. 238 con data do 16 de decembro de 2013) modificáronse os artigos 3 e 4.1. Estas modificacións entran en vigor para o curso escolar 2014/2015.